

崇雅堂駢體文鈔

崇雅堂駢體文鈔卷三

仁和 胡敬 以莊

游靈隱韜光記

閒偕同伴借地繙經肯負佳辰隨僧行腳小集如魚之隊同登
選佛之場維茲香火之清緣亦筭人天之小果則有長齋蘇晉
說法維摩支郎先把臂以在林陶令亦攢眉而入社是日也湖
如明鏡不動纖塵山若定僧自含真性朝旭懸正法之炬明明
在空水藻漾恒河之沙了了可數衝波一葉憑作慈航清風半
帆送登彼岸於是牽枝引手捨筏抽身安步當五行之車指迷
遵八正之路枯竹代錫一枝飛空生衣染繒七條畧似無一由
旬之地到給孤獨之園喤響魚山林圍鴛舍琉璃瀉地篤繹吹
香慧日照而池湧金沙慈雲蔭而巖飄花雨千佛崖際擗葉爲

衣五夜山中蓮花當漏洞口列點頭之石波面浮聽經之魚爾
乃華開陀羅自然微妙剎時阿育不假莊嚴半榻茶煙一聲山
磬漾此空色悟到無聞日於初地以增長人至諸天而彌靜遂
穿靈鷲而旁出還卽冷泉以少休焉或結跏趺或捉巾拂或觀
空以得意或內照而忘言脩脩然洗心臨功德之池忘身在苦
惱之海矣已復辭下界叩元關躋最上之乘探無盡之藏縱復
石頭滑甚竿頭進難而作平等觀離諸恐怖無退轉念具大神
威枝攀寶樹以徐行徑繞金繩而直上四圍竹色無非蒼筤之
林一帶禽聲卽是頻迦之鳥谿流播廣長之舌側耳泠泠山翠
示清淨之身舉頭歷歷於斷竹續竹悟接引之因緣於上方下
方現須彌之世界又何必登極樂國歡喜纔生人舍衛城聲聞
始證哉惟是未離結習空託經行笑我逃禪徑欲凌風而浮白

從渠演法何須肆口以雌黃但容米汁三升陶然中聖甘守蒲團一箇老去爲僧所願寄一椽於彌勒之龕占十笏於華嚴之界飽餐香積飯閒看貝多經參禪而不逞機鋒呈佛而時多詩句於此細草長松之地猿嘯鶴唳之朝送客過谿拈花示衆洵足樂也終以三明未澈五濁難捐暫憩祇洹還歸塵網晚鐘催客三生空約重來歸路然燈一瞬便成過去未知何日與諸公共登兜率之天祇恐他年偶失足便墮泥犁之獄冀超凡而入聖敢援墨以證儒同游者葉子燾彝張子震軒汪子選樓及趙子雱門與余凡五人三君子皆熟精浮圖經者爰撫梵莢之緒餘以壯山游之行色并以示雱門云爾

小檀巖室讀書圖記

別爲奚文鐵生所寫讀書是室者齊梅史范小湖著琴陽父積室家私白凡五人

丙寅春暮余將有東甌之行輪蹄告勞稅駕方定山水攬勝游

情復濃家秋白出是圖屬題見夫紙上雲煙如甫脫手卷中姓氏多半知交迺感存亡愴懷離索憶自壬戌之歲五君讀書山中余以閒居偶一過訪山徑孤寂寒龙吠人石磴盤空旋螺到頂柴門不正倚巖而開拓窗以觀大江當面其上則古殿陰森下有蛟窟風雨遯至時聞吼聲自顧此身懷璧何有所恐佗日挾山而飛折而南老屋數椽爲五君偃息之所虛牖不掩列楹凡三對牀而眠與佛成六磬盞絕響禪逃而儒琉璃一燈夜以繼日指蒲團而坐客雜梵筴以攤書其旁花木蓊然則小檀藥室在焉芳草敷砌綠陰滿窗據之而吟有碧梧之一樹涉以成趣有紅薔之一籬中則牙籤雜陳墨瀋狼藉稿置几上因刪未全幀懸壁間就視猶灑解入此室諒無俗塵能來其譚便成佳士後接蕪圃綠以城垣小池一泓積水明澈池中有蜥蜴五色

云通神靈閉置盎中還入波內旱煥之請可偕土龍宛若之呼
無界壁虎春夏時屈草木怒生修蛇盤盤大以丈計尾掉屋角
身蟠礎間屠侯爲言地復多魅陰晦之夕羣來赫人時嘯一聲
或露半面五君恃膽如斗恒以夜半乘茲酒酣譁然啟門相與
捉鬼或復朱墨塗面跳浪漫山逞儼舞於天魔效變相乎地獄
余性雖怯試誠授以白挺數尺沃之清酒三升尚能爲諸君助
一臂也惟斯荒寂之境游展望而不前誕妄之談迂儒聞而卻
走而諸君樂此以數晨夕散襟顏倘傳後來定誇勝事昔愚谿
以柳子著蹟小園由庾公得名地以人傳豈不亮哉今者奚丈
墓木已拱楹書不存葛巾衝寒并乏西華之嗣絮酒一握疇眞
北邙之塋畱落人間祇此墨妙梅史以就試京兆驕栖長安固
知春草工吟卜居易易其奈屋梁明月相望迢迢積堂少年維

揚遠客睠彼玉立跨鶴何難惜無脂行曳裾不慣小湖苦所居
湫隘妨此嘯歌馬融之帳借開揚雄之字待問雖頗齒未邁健
飯依然而莊缶再歌其心傷矣屈指儕輩所能俯仰自如睥睨
一切採陔華以養志麋原鶴以悅情者獨琴鵑與秋白耳嗟乎
人生百年豈當如麋鹿之聚男兒墮地要自懷四方之心而青
春不長知己難得茫茫人海機穽藏多苒苒年華星霜侵易世
味如此山游信佳僕行矣春水一江布帆千里嚴陵之瀨枯蒼
之山龍湫鴈宕之奇觀右軍康樂之遺趾筆不能述行綴以圖
侘日攜與歸來諸君其能以片言持贈否

慈柏記

蓋聞擢孤芳於勁節木乃稱貞解新繹於寒林筍因表孝誠感
庶類德徵殊祥如吾友慈柏余君其母若子兩無愧矣余君儲

竹箭之秀抱蓼莪之悲梧楸慕深搖落感繫撫斯遺植繪以成
圖憑雙管之生枯寫一枝之榮瘁君太夫人當禮李之載舍貞
松之姿暇於閒庭藝斯珍木培尺寸之幹勢已參天勤灌溉之
功生而得地上襲芳蔭下承清芬星霜屢遷柯葉逾盛賴彼葵
藿長抒向日之心庇茲蘭蓀卽號恒春之樹前此太夫人六旬
開秩二豎嬰災柏亦憔悴可憐根株垂朽碧梧落早先驚一葉
之秋黃楊戾深難過三年之閏已而太夫人冲養有素神明再
完迺復欣欣向榮鬱鬱彌望天邊之若木向晚曾焗海上之枯
查經春復茂三眠三起靈和之柳依然半死半生龍門之桐長
在暨乎桑榆景逝松菊庭荒而此樹婆娑悲風蕭瑟生意盡矣
攀條泣然寸草之心報春暉於地下丁蘭之木畱手澤於圖間
慈蔭長垂孝思不匱若是者豈非草木之性多依於人感通之

機先應乎物是以祥桑示警於商室樛木發詠於周詩庭槐植而公輔興園荆瘁而昆季睦矧茲風木所寄陔蘭是循比類嶧山之藁同符潁水之荻在昔王裒攀樹表異恒枝樊衡倚廬垂蔭廣畝至性所感方斯畧同堂北萱枯君自抱終天之恨山南橋圯我亦懷孤露之悲

梁弓子鳳麓讀書圖後記

梁君弓子紆汲古之遙念拓平泉之舊莊千峯繞廬萬卷在握巖谷之勝旣傳以圖箕裘之思復述以記居乃別墅讀惟賜書披君是編發我深喟憶當乙巳之歲奚叟以冲澹之致契心林泉吳丈以休沐之閒訂盟鷗鷺與先子椅裳連襪選勝尋幽觀潮曲江弔古斯麓敬時以應門之暇操杖而從見夫豪飲瀉淮清言霏屑醉墨橫灑則雲日麗輝高吟入神則林壑答響俗殊

金谷之讌雅比蘭亭之游歲月不居星霜屢易雲林墨妙與身俱仙玉局風流點綴有雪而先子之棄養蓋忽忽十有八年矣彭澤逝而蓮社衰童烏存而草元絕墓木已拱空懷結廬楹書尙存曾未卒讀貧賤役於境憂患傷其心而學業遂以無成也暇尋舊游追憶諸老眄逝水之不復數晨星之寂寥未嘗不泣然久之嗟乎門望不同堂構無別君績學髫髻得過庭之訓深寄情煙霞耽負郭之境僻禽鳥娛其觀聽水木助其清華桐材本清彈海上而彌逸蘭質旣粹值山中而自芳研覃以深領悟斯遠於焉續班氏未竟之緒成眉山一家之言炳輝當時紹美前哲其在斯乎其在斯乎若夫家聲之隆世德之厚具載前記不煩贅言

梁星子陵茗精舍讀書圖記

出郭門遵繫纜之石望棲霞之山眇夫丹成而飛井尙傳葛鶴
去不返梅仍屬林仰仙翁之遺蹤訪隱士之舊宅水木明瑟雲
烟往來朋招白鷗舫機青雀厓畔紫藤垂蔓垣瀕綠波青豆開
房扉櫺白板則文莊公之別墅在焉雛僧應門龐衲挂錫曲徑
幽絕蓬蒿不芟閒庭翳如花木殊茂沼貯澄碧通以平橋籬遮
疏紅閒之修竹梅屈奇幹半皆成苔松蟠怒枝堅欲化石有陵
茗百尺附松而生蛟龍攫拏纓絡繚繞施比蘿薦扶殊蓬麻當
夏斯榮著花可翫映日成紫與槐同黃此精舍所由得名爲星
子讀書之所也列牖不掩雕欄四周中爲佛龕右闢僧舍捉鼻
成咏諧乎梵聲冥心造思警以鐘響旁有隙地建之層樓窗虛
納雲檐迴接月峯影綽綽徘徊鏡中波光濛濛浮動几上前
孤嶼後枕危巖游船不來菱芰彌望幽鳥哢喚老漁唱歸風漪

一區煙景萬狀君絃誦之暇登斯息游清華之資擴彼襟抱行
見經術遺緒紹美匡劉典冊高文嗣音燕許也已在昔槐蔭流
美桂馨表奇故家之存望重於喬木遺澤所在愛先乎甘棠昭
德傳坊明謨啟閣況復宗祏所寄庭誥是承十年百年歸本於
樹德一草一木畱貽乎後人者哉茗華正繁隄望白沙而識處
書讀不輟堂躋綠野以聞聲

厲樊榭徵君栗主移奉交蘆庵記

古賢者沒而祭社設有監祠以奉粢盛以司宗祏魂魄戀此枌
榆儼然矧夫笠澤游多輞川圖在碧雲青嶂遺壠非遙白露蒼
葭伊人所契者乎徵君樊榭有子承祀無孫紹宗嫠婦靡依小
姑相逐棲神何所載主而行偕令威以來歸效浮屠而寄宿分
索郎之釀味叨清閤之桐陰憑是壻鄉比乎友殯而乃窗窺朱

鳥刻認丁蘭捏佛奇生通靈化去豈真委莽未免傳譌於是名
流譜以清詞碩彥廣其新語爲位置馬塍里畔山谷祠旁薦少
寒泉皮從高閣縈鼠跡蛛絲而幾徧與牛衣龍具以相參飽嘗
牆角之酸風冷照屋梁之明月可慨也已今春趙雪門刺史與
蔡木龕李西齋諸君商以先生墓在西谿主宜近耐乃擇交蘆
庵之塔院諏日遷奉焉中爲先生其右則先生側室朱氏也同
龕彌勒成換骨之神仙相伴維摩有散花之天女閱春秋而兩
祀蔽風雨於三楹想曩時遷石開尊叩舷度曲一筇拄雪雙屐
拖雲路宋輦以苔封山秦亭而翠滴新詩幾許舊夢難尋賸秋
水之彎環對林梅之蕭瑟莫不流連光景彷彿生平從茲勿務
增華以期垂遠守斗酒隻雞之約勝事可常其倚裳聯襪而來
扁舟徑渡相與整齊肴蔽拂拭壺觴蘆中人蘆中人庶其靈爽

式憑苾芬來享也夫

明東林諸賢墨蹟記

士大夫之以翰墨流傳者取其工乎抑重其品乎工則寫經之體太學之徒比類胥鈔騰譏卜筭矣懿夫羲獻嗣蹤於晉室褚顏邁跡於唐英其人皆義薄雲天忠貫金石心正筆正自古爲然是以蔡元長名重宣和不預四家之數賈平章帖摹修禊曾無一字之畱愛憎在人豈不諒夫慨自黨錮傳於范史黨人籍乎宋碑李杜齊名蘇黃方駕莫不忿其氣節毀及詞章到於今聲稱儼以八元碑版照乎四裔他若李牛恩怨朱陸異同君子有爭相臣無度然而衛公遺刻至咸淳尙貯禁中元晦畱書與魏武同其筆勢卽儲藏之久遠證身世之遭逢觀過知仁於斯益信明季黨禁比乎漢之甘陵宋之紹聖爲禍加烈與國偕亡

一時起而攻者有諫垣恣其毒者爲奄寺三案反覆七錄鉤稽
始因門戶之分爭終致根株之痛斷碧血淋漓於讞牘丹心炳
耀於封章誓寄柏臺詩吟柴市可勝感哉斯冊所載其行誼具
詳明史及東林傳中而二泉號爲黨魁時推墨聖擅顏柳之
筋骨闢董文之徑途寸楮偶存尺璧齊價其他若涇臯成小范
案叔美林參之才或箴或銘爲箋爲牘崇論宏議筆飛墨騰視
躬則崔瑗銘座之辭修業則張華勵志之賦設教則昌黎進學
之解挽俗則文山正氣之歌維繫人心主持世道淵源鹿洞尸
祝龜山徒以託足清流挂名鉤黨斥逐相繼齋志以終詞翰流
輝斯人長在嗟夫文德門前之石安民尙惜其名元祐罪黜之
人司馬乃居其首以是知歐陽子之持論猶守常經申屠蟠之
得全不關晦跡藝之工者遭恒蹇品之峻者忌益深諸賢之坎

何一生諸賢之流傳千古也僕薑牙斂手馬齒驚心曾抽錫山之帆叨編淳父之鑑亦欲知人論世表微聞幽況乎墨妙筆精照燭簡外清風亮節流露毫端豪奪不能假歸尙許爲之評量出處綜覈平生期踰十日之留欽遲無已名附三王之後榮幸何如

康熙丁卯浙江題名錄記

乾隆嘉慶兩丁卯吾鄉周在清梁山舟兩先生前後重臨鹿鳴郡鄉舉於康熙二十六年梁鄉

舉於乾隆十二年皆丁卯歲也先是學士於城南方姓家見壁上表挂康熙丁卯題名錄一紙爲著名紙尾並作詩紀之駐學士膺曠典選異數復作書後及跋語以誌吾鄉佳話在清先生之曾孫堅白索學士書冊一時諸名公題識殆徧今學士書已失去堅白從類羅庵集中錄出欲倩善書者補書而余爲記其顛末云

羣仙高會分綴班行千佛名經同深頂禮元晦紹興之舊錄兼署小名慈恩古剎之重題例添前字眞靈結習誇鐫名玉簡之中香火因緣同注籍羅天之上則有望崇泰岱輝麗文昌當玉兔之年華到銀蟾之宮闕時也嘉賓讌集有老皤然古殿靈光

於斯仰止心香一瓣得瞻茂叔之風儀緣分三生竟荷昇卿之
題跋蓋學士以家山歸早翮倦高竊因省墓於春雪晴餘泥尋
舊印偶經三拜之宅頓興五噫之歌見夫故紙猶完素屏高揭
科名年遠榜帖天畱鳳是呂安題來鶴已令威飛去爲之摩挲
舊刻拂拭新埃黃絹聚成碧紗籠出憑長洛陽之價眞同脈望
之仙豈知前事堪師後塵追步當年法曲邀顧周瑜此日醴筵
爭看梁灝泥金影裏仍簪君實之花蓮炬光中

特晉子瞻之爵始信後來居上重換頭銜早知修到非難果傳
衣具是翁嬰鑠又徧聽佳話流傳野老收藏原畱作此時印證
竟規重而矩疊雖苔異而岑同翛然二老之風流藉甚

三朝之掌故今耆人雖求舊識應龍蛇書復通靈走同珠玉久
羈代北失窺卷裏之驚鴻有約城南來訪壁閒之殘蠹爲拈湘

管以寫遐心欲仿蘭亭奈無好手溯乃祖庚寅覽揆已再周絳縣之年喜文孫丁卯名編可重補青箱之記

張母王孺人苦節記

閨門之最難處者其在丁單族鮮夫亡子幼時乎外侮之所易萌內憂之所隱結宗祏之所恃以守世業之所賴以全吾於孺人有深慨已孺人系出烏衣簪諧鳳卜漢臯解佩來奉清塵燕夢徵蘭早符佳兆學生似祖骨相宜男時南臺公以貨殖起家權會從事示儉於緇袍脫粟訓勤於燈影機聲孺人當弧矢門懸煩擱躬理擁樹寒夕磧桃芳晨牙牙語而繡葆纔離雁雁行而曇花半坼蓋藍田之產原雙璧而郊林之畱僅一枝以是葛細綿溫量時裁製純甘熊苦佐讀賢勞俸從問字以延師盼至請期而授室養成毛羽季隗則廿載身劬景迫桑榆陸展則七

旬年邁俄而宵幃捲蕙曉幕嘯烏憐新婦之初來病難操作慙
孤兒之失怙學就荒蕪勉執牙籌俾嫻心計韓康入市守價不
移陶朱避名治生爲急然而米鹽淩雜牖戶綢繆家少添丁事
多殉午竟伏戎之在莽將入室以操戈孺人倚任老成申明約
束情辭慷慨禮法森嚴雖糾紛與虞芮之爭終出納守蕭曹之
律甚且焚香清夜哀籲神明髮髻蓬飛麻衣雪滿卒使豆分瓜
剖案帳重釐捆載囊垂貲還如昔不有健婦誰爲保家哉嗟乎
五角六張家庭多有茹荼含蘖蠹範宜然所難門戶凋零屈節
作周家之婦宗支維繫半生存趙氏之孤手挂口經家方再造
腸迴骨出人又云亡內絕期功疆近之親外迫風雨飄搖之勢
嫠是永訖蔗乃側生而竟支厦將傾完巢已覆信由矢志果慮
患深誓慰朽魄於主翁貽息幣於孫子也以彼頌椒吟絮才雖

美而濟變則難化石磨笄志雖貞而教慈則未夫惟苦節乃得
甘臨若孺人者卓然能亢女宗無慚家督者矣

黃蔭人秋江采魚圖記

事蹟詳薊泉序
見清尊集中

嗟乎金粟前身曇花小影離離短幅墨瀋如新采采扁舟煙波
無際此余友薊泉仲父蔭人遺翰也藝本神悟慧由夙成但觀
敗牆已徹懸解偶弄芳尊便嫺寫生傳其隱扶風之帳中貌丁
鶴以神似如彼周昉見稱令公底須劉琨更問老婢以故一時
耆舊三徑過從歎未易才呼爲小友山次何點雲隨陸機同游
通德之門獨賞營邱之筆至今贈佩愴懷於渭水挂劍遺恨於
秣陵倘容假年應在魏舒以上豈期早世難冀顏回復生茗華
不畱玉埋何速彩筆初授花燦無多觀其值江上之峯青識濠
閒之魚樂含毫絲邈攬景澄鮮蒼葭接天白露猶溼樵爨綴其

墟落浦漈狀其潏洄脩脩乎腕底雲霞卷舒在望人閒煙火吐
棄無餘如游武陵之源已入迂倪之室足使崑崙悔其故習摩
詰訂爲知交者已而乃縑素空存風流頓歇悲哉秋氣渺矣江
波宜蕸泉之睠懷竹林珍重繭紙合浦驚徙延津感分也乎所
幸塞馬馳還楚弓求得竟大癡之筆妙因小阮以名彰贈我錯
刀報人瓊玉張圓燈於藝海昔峙峯三搜妙香於墨林今畱枝
一持多易少心殊快然由半得全意在兼取庶幾趙璧更從閒
道以歸來慎莫顧厨再致通靈而化去

羅君

焚

廬墓圖記

古之人遭親喪成壙而歸倚廬於外地則牆東戶北身則枕塊
寢苫別其名爲菰廬差其等爲聖室載在通德之論見諸曲臺
之經有謂居廬在門祭墓非古幽明道隔未可瀆神竈安禮修

奚取越制不思端木反築獨居者三年窆石畱封聚處者百禩
謂非廬墓之前事乎羅君榮光旣祔葬其母孺人於先塋爰繪
是圖請余爲記甘露屢降來徵舊史之言飛鳧在池宜續先賢
之傳按吾友陳君善所撰誌銘知孺人以尊章告終夫子偕逝
死貞死孝奇變驟嬰身亡與亡藐孤誰託是用撒其環珞佐以
組紉糠覈晨炊機絞宵理井竈蔥蠶取備十指之勤行潦蘋蘩
無缺四時之薦卒使門戶再造室家繼成孺人之心可稍慰矣
而乃娶婦兩世喪孫八旬嶧陽之桐早枯卷施之草因萎其在
蜀志載李密之書曰母孫二人更相爲命孺人有焉榮光幼承
夔訓長讀楹書蜚聲膠庠紹聞詩禮感茲孤露屢廢蓼莪之章
操彼奇觚克傳爾雅之學榮光之志可謂勤矣而乃鰥魚數奇
童烏竿促西河之痛曷已恤緯嫠窮東野之願莫償攬暉春短

霜露時至日月有期攀松楸以寫哀營兆域而盡瘁其在唐孝友傳載元讓之葬母曰營築其墳不役僮僕榮光有焉嗟乎琅琊淑媛瘞兩母而結廬會稽荒阡標三女之遺構圖凡二墓其一葢孺人縮衣節食手据口瘡懸髻涕零麻衣血漬以成焉者也榮光力耕少田傭書自給雖挽須之有女尙拜後之無人荼蓼苦集於丁年谿山戀深乎丙舍成母之志傍祖之原牛宮一區馬鬣三板以視世之綽楔霄揭最負星連華表梢雲翳仲列隧者其難易勞逸何如耶昔吳明徹以葺修舊埏槁苗爲之秋實金安藏以棲止先隴穠李因之冬華至性感孚休徵昭著孝經援神契白庶人孝則木澤茂浮珍舒怪榮光他日其將致馴兔之異羣鹿之祥芝草叢生醴泉漢出如史策之前載者歟敘馬少監三世媿乏昌黎之才表梁文貞一門願乘季友之石

梁園大招圖記

梁園大招者汪容甫先生哲嗣孟慈悼風木於前人表金石之
先友丁蘭寫象丙舍樞圖託離騷誌永感也先生之學本末淹
貫有良史才其文淵懿精深不諧時好其行風骨稜厲動與俗
違抱經盧學士祭文伯升王尙書行狀言之詳矣晚年應嵯使
之聘延校閣本僑寓湖濱梁丈山舟喜匡鼎之來游關平泉以
相待藝譚許鄭交聯紀羣俄以末疾偶嬰怛然遷化一時耆倫
碩彥相與視含斂爲位而哭者無慮數十輩生芻一束清酒三
升寄林宗之愴懷想公明於疇昔孤嶼送影朗如禪智之山涼
波作聲淒絕廣陵之散在昔康成之沒赴會者加絰而來元伯
之喪執紼者剋期無爽長沙悼鵬之讖山陽聞笛之悲得此九
原可以無憾善乎馮敬通之述志曰三公之貴千金之富不得

其願不概於懷貧而不衰賤而不恨年雖疲曳猶庶幾名賢之風修道德於幽明之路此先生以之自況而吾鄉士夫共信先生之能以終身名爲後世法者也或者不察猥以南交被放跡類虞翻西蜀瘞亡名湮胡綰傍要離而作冢空弔侯光答秣陵之遺書不聞劉峻傳聞失實斯固居是邦者所宜辨正也爰書圖後以俟後之志寓公者有所攷焉

章次白西谿補梅圖記

西谿當湖山之陰擅林木之秀千峯屏列靚冶如妝一水環回清泚可鑒傳聞夾岸徧植寒梅耆舊於斯觴詠藉盛花陽遺址徵諸梵隱志中秋雪殘時引入羅浮勝處近以樵采不禁荆榛相搽孤篷偶經游屐罕到安得林逋閣外偕鶴歸來已同禹會梁空隨龍飛去遂使丹崖掩嫺碧磴懷慚翠羽欲集而徘徊清

谿漫流而嗚咽嗟嗟幾生修到蕩焉已若雲煙何地無才遺之
偏在草澤夫豈無雪晴揮翰玉照題楣百萬買隣三分占水其
人亦欲攀援雅尙依附名流於金迷紙醉之鄉備清淺橫斜之
致一時獻諛者擬諸東閣誌美者詡以西岡然而閉靜女於叢
臺不若眄佳人於空谷飾華軒以寵鶴不如闢淺渚而眠鷗所
貴物土之宜補天之缺簣簣署谷種宜萬个之琅玕豐樂名亭
鋪稱千畦之穠稔使以姚魏藝諸茆舍則神采爲之不揚矣松
檟植諸市廛則根株因之痛斷矣惟梅宜倚修竹宜託微波以
古而奇以野而壽不役於物自全其天位置當巖壑之中臭味
在酸鹹之外以彼園丁狡獪意匠經營慣換羽以移宮竟桃僵
而李代關竅鑿而混沌死鐘鼓饗而爰居驚是知絳英紫英不
入柴桑之徑爲臺爲品不宜茂叔之池良以矜奇炫能無關真

賞因利乘便自在解人也次白章君向汗青以乞靈知鄭白之
爲沃分金淡竹旣濬其源疏影暗香思返其舊謂夫乞來楳木
杜少陵堂就題詩栽徧平泉李衛公墅成作記緬靈芬於庾嶺
馳驛使於揚州遠憑健步而移早聳吟肩而待千樹萬樹擇地
分添多華少華隨人作供底須守價君原非賣杏之仙人待到
初春我來看散花之天女

答許青士書

敬啟前日不揆禱昧蒙示大集雜誦之下如與君對醇意所發
實獲我心竊窺諸作五言雅馴近體流麗歌行元本太白規撫
靈均時於行閒流露真氣真氣所在情韻生焉僕嘗論之發言
爲詩如彼動植蟲姑樵悴猶尙愛翫蜀葵絢爛不加睽盼一有
韻一無韻也圖成佳麗遠勝姑射謀薦寢席不如齊女一有情

一無情也是故推襟送抱豈必在在膠漆而情深者無淺語風
雲月露豈必念念忠孝而韻逸者無凡響使才士著犢鼻滌器
市上依然風流強市僧捉麈尾以助譚柄祇益醜態此又雅俗
之所自分也方今論詩率以詞勝求諸前達未悟斯愾夫琴瑟
專一誰能聽之文章不同有其面縱不能謝朝華啟夕秀以
戛戛獨造亦奈何是末師非往古而陳陳相因豈有攘取秦樓
楚館片言即可稱玉谿再生覓得步搖條脫佳對遽自詡金荃
麗製哉僕固舊坐此病所苦欲改未能君信別出新裁應歎斯
言不謬耳附上次韻詩如干首小令如干首統希鑒別伏俟箴
規見軍中鼓琴已早心怯聞市上擊箴又復技癢然魯酒寡味
知稍嘗輒止賜牆及肩早一覽無餘矣燒燈節近新吟定多賀
歲人忙遲日過訪

答吳聽山書

千鴻叫月如坐深山一鶴銜書忽來遠道發函驚喜深慰離悰
勸我加餐知君無恙中敘闊沙易散戴笠空盟飢驅少閒學植
如昔我聞斯語能無愴懷人之相知貴在情愫猶憶曩歲歡敘
生平野寺尋碑孤篷聽雨把蔗竿而起舞撫石鼎以聯吟態笑
余狂詩嘲君苦一旦判別三年於茲義馭不停萍蹤難合悲已
僕頻年夏課忙過半生獨對春風舞來六度妻孥竊笑路鬼挪
揄嗟嗟殺青難窮還白無術齒少潘安仁之歲已見二毛命如
羅昭諫之窮竟慳一第有時欲盡焚筆硯而蠹魚自故紙外更
何處可覓生涯讀書原不爲功名而啖蔗入老境來於此中得
少佳趣徑欲摒棄一切發憤三餘解脫因緣破除煩惱日錄五
十紙口誦八萬言則又語不驚人夢少投懷之錦簿空點鬼胸

無記事之珠雖儕輩悠悠誠亦未肯多讓而如石落落其將何
以爲情重以門戶支持米鹽凌雜護麥田而成黃鵲之賦情隨
境遷向秋風而感白頭之吟歲不我與辭典雅足傳於後惟君
宜早圖之臣少壯猶不如人其他類可知矣難期後會還憑夢
裏逢君忽發狂言所恃友能知我

寄施陶村書

小別半年相思千里前於月朔接奉手函得悉佳安藉慰離索
僕依人作計勞積如薪追暑言旋倦飛猶鳥所幸師門寄跡文
字爲緣脫畧形骸埽除結習席帽竟月不著於頭絺衣終朝嬾
被於體無人責備容我疎頑所居當使署東偏屋凡五楹人占
一室竹牀鬆几蘆簾紙窗南榮碧梧北牖修竹古柏如蓋森挺
於隔垣高槐蔽牛分蔭平芻舍堂虛以敞清風時來庭寬以閒

明月得早東接佛刹午聞齋鐘西排吏衙晨聽官鼓以宴以息
朝斯夕斯爾乃西北之隅有園一區有池方畝赤欄橫亘橋低
壓波紅蕖挺生花高過葉旁則小山累土翼以茆亭虛廊繞垣
建之傑閣列雉如帶凭闌而觀浮圖一尖穿樹以出每當曉露
晞後斜陽下時乃偕同儕此焉登眺花木麗而風日美性情洽
而詩篇陳蓋亦一時之樂也雖然僕竊自慨矣僕年未強仕而
比來布指以計衣帶覺寬努力思加餐飯反減非疾而體常不
快多慮而夜輒忘眠攬鏡鑑形元髮改素對酒強飲朱顏易酡
當茲壯年便徵衰態若是者良由襟抱不曠境遇多艱事未來
而先憂境已往而輒悔兼之智慧有限嗜好不專徒泛涉乎百
家鮮擅場夫一藝處世則絕無樹立爲學則鮮有師承落落半
生茫茫千古才質如此分非功名中人就令優孟衣冠時而幾

演京華塵土身與周旋而米價長安欲居匪易世情翻覆行路
大難正恐蠻府參軍無時作郡馮唐白首猶是爲郎彼夫攀附
風雲迴翔清祕朝策道旁之蹇父唱車前之騶彼何人斯實命
不猶健羨亦何裨哉但使田耕負郭廬枕清流池魚足以養親
楹書足以教子爲善克承乎往訓成立得見乎後人樂以忘憂
是亦拙者之爲政也足下方當按圖待索挾策逢時聞此迂談
得無訕笑故鄉歲歉如何如何長夏風炎珍重珍重

與汪遜樓書

遜樓足下與足下別後裘葛已更梅霖積旬涼燠不定眠食何
似思之爲勞僕自抵暨陽因佐校愬愬出行遵塗鐵甕之城弭
櫂金陵之邑渡長江以徑北指滄海而徂東平生壯游莫之過
矣爾乃棲霞山色采石磯形朱雀航頭烏衣巷尾落英滿地芳

草黏天三月煙花六朝金粉形諸歌詠正什不得一二耳至若
酌中冷之泉味聽浮玉之潮聲攬轡白下之門尋春綠楊之郭
名園芍藥計畝而栽畫舫笙歌溯風而聽弔辟疆之故址則雉
臯暫畱訪成連之遺音則狼山欲上徑思槎浮博望身到蓬萊
揚舫中流挂席千里志雖未果而一時邁往之概足下當亦聞
而壯之若夫新雨聯牀校文中夜房如蜂次火似螢青明月鑒
幃捉管不置殘漏就枕聞雞又興燈影幢幢筍束戢戢多以尺
計爭此寸陰而貧馬百竇逢豆絕少春蠶千箔食葉皆僵閒有
詞旨麗都體裁溫雅庸中傑出相與賞此奇文喜極妬生還思
貼以如意然吾見亦罕矣語云千里一聖百里一賢小道且然
安必其爲賢聖耶嗟夫文章如面而自識爲難得失寸心而可
信安在攬鏡自照頭顱已斑仰屋而思歲月空擲植松柏於籬

下久無干霄之心閉孔翠於籠中時存霞外之想重以羈孤遠
道冥莫重泉舊雨多疎故人難作雖復苔岑密契訂有知交縞
紵爲歡不無篇什一時高曠之論瑰奇之文亦足拓人心胸攄
我懷抱所奈文通賦恨平子工愁偶衆則少捐孤處則交集每
當涼雨灑幔淒風動帷宵長鼓沈窗暗燭滅心鹿鹿其有觸目
鰥鰥以無眠未嘗不悄焉傷懷歔歔累息也此情此景惟足下
能知我焉側想足下沈酣載籍排斥百家契心益深名世斯遠
寒家瑣屑老母興居還望時相過存以慰懸念涼秋在卽聯襪
匪遙不盡所懷伏惟垂譽

與葉燾菴書

別未半載杳如三秋契彼苔岑通以寤寐僕貪看風景頗倦輪
蹄四月下旬始克返自維揚消此長夏澄江小邑試院閒居簿

書不來吟詠殊適寬鞵瘦鞵不異田園之居翠竹碧梧頗饒林木之勝所患地隣滄海颶風易生時際黃梅霖雨不絕一庭積水五月披裘麥刈而漂禾栽以藝此閒荒政已糶常平之倉其尙有年無傷晚熟之稻比聞浙右同此饑飭免羅頻罹雁戶彌望如何如何日來陰霾漸消熱毒殊甚望前猥以校文之役又有觸熱之行秋陽逼人暑行可畏亦知入世大抵如斯爲擬行蹤足資盟噤爾乃一肩書擔六幅蒲懸由揚而通自春徂夏北飲淮水南眺鍾山迎潮長江觀日巨海權衝雨而晨發篷映月以宵征此如老僧打包行腳若夫崇轅一閉短垣四周柝以警宵而當晝發響樓以眺遠而有窗盡扁啟行恩恩途昧南北飽食頓頓暑忘晨昏輯鱗同池中之魚決背望天半之鳥此如靜女深閨寂居至於握槩懷鉛論白道黑十行齊下五官竝用筆

不停綴目無畱瞬衆美集而熊魚難兼羣醜呈而蕭艾亦錄同披榛以揀取疇探驪而得多獲雋而譁又如漁父兼是數者旣以自笑行復自慚要之行路大難知音不易非箇中人曷由信之側想閣下庭闈密邇弟子來前康成之草敷階茅容之饌敬進暇復棲心禪悅祇事金仙婆律之香一枝楞嚴之經十品心如水平定身與雲閒此境難修於君可惜尙願轉移恬澹之志馳驚進取之途俟他日閩苑歸來香山社啟於以從維摩而說法晤支遁而談元未爲晏耳歲月馳驟轉瞬秋來眠食佳安臨風軫結

答葉燾菴募輯釋典韻編書

敬啟某月日奉到尊札雒誦之下五體投地不知所云自顧何人敢鴈斯任伏維三十六母闡韻學於沙門二十萬言譯梵本

於皮牒翻切所起部分之嚴揆厥由來斷歸彼岸矣先生精覃
內典提倡元風以慧業之文人作詞壇之禪伯搜劉向西京之
錄得浮屠七十四賢緇靈運南本之經演妙義六十二卷良以
釋法顯則躬繕薩婆多律謝慶緒則手輯楞嚴真詮嫌密行經
卷帙之繁慧遠親加刊削恨首品經章句之闕士行遠出尋求
以至南安擅轉讚之工東安矜習誦之博莫不因緣文字觸發
思維祇樹林殘鐵門限敞況復九十六種杜衆邪之門一十二
緣開先覺之路爲迷津之寶筏爲法苑之金繩爲藝圃之旃檀
爲詞宗之衣鉢也乎是用乘參最上會啟無遮建精進幢浮淨
覺海發勇猛願生歡喜心遂解髻珠開梵筵分我等以摩訶之
第十九大品之第十三瓊函始披驚觀大千之世界戒律先定
同遵不二之法門或謂談空空者契元關味如如者歸寂照彼

釋迦掩室於摩竭淨名杜口於毘邪悟風幡之本無散天花而
盡落總由悟入匪恃言詮不知給孤獨之園黃金布滿阿育王
之塔七寶裝成鬘帳千重祥輪五色現法相而纓絡圍繞鬚眉
階而琉璃合成豈有曳壞色衣猶說一絲不挂入衆香國甘心
空手而歸哉惟是三寶流傳恒河沙數一音演說浩劫塵多欲
哀小品之標函須資正法之眼藏所貴鉤稽宗旨勘落繁條斗
薨俗氛破除魔障心香一瓣信手拈來柿葉三閒然燈寫徧哺
小兒一千道之乳胞胎本同綴牟尼八百顆之珠貫穿不絕金
鈴箇箇玉磬聲聲於無盡藏得小三昧編大藏而都爲一帙寫
阿毗而奚俟三年至若曇延涅槃之箋襄陽般若之注校從他
日鈔望後人甄解析疑美先現於彈指澄覽博映多無取乎搏
沙從此舍衛城中不勞乞食靈山會上便悟拈花要使一粟微

茫廣開無量之功德半盂澄淨消納兩戒之山河霑溉自身布施大衆君之宏願我所深參敢不借法炬以照迷數貝多而分輯如乙如巳體仿佺盧之橫行多華少華暇從迦葉以參究因述我聞之如是未知君意之云何

卜居對

客問主人曰子亦知枳棘非鸞鳳所棲潢潦非蛟螭所萃乎士君子曠觀宇宙之大蟬蛻塵埃之外所當判嫩惡於薰蕕區清濁於涇渭豈可領羣仙而儕戚施佩芳澤而襍蕭艾哉子昔嘗陟清要登明光校書天祿之閣探委宛而挹謨觴乘輶軒督膠庠臚行館於都邑坐駐節之堂皇行將厯崇班膺顯秩希榮金紫之階側身槐棘之列而乃歸田早賦齒未桑榆互鄉與語窮巷是居不爽塏之徙而湫隘之娛安神無離垢之園比蹤有逐

臭之夫後列肆則朽蠹斷爛冠纓履綦截袍成襦指轄爲皮前
潁港則鹹瀉疆槩草人物宜爲句踐所嘗廉頗所遺望衡對宇
則宗廟櫛比細逮屢屢爲子厚所賞敬宗所譏徑術闖盜埃壙
紛披乘軒者過而輶蹙安步者望而嗛呷奈何下喬木而入幽
谷豈欲化臭腐以爲神奇夫百萬買宅千萬買隣此宋季雅之
擇仁而處也書庫池北琴亭池西此白居易之適情而賦也今
縱未遑高閑閤後牖戶釣置舟射除圃亦可借別墅於右丞割
小園於開府冬無峭寒夏無煩暑庶幾邯鄲不失其故步也奚
必傲林處士之所不能犯楚大夫之所深惡哉主人曰水至清
則無魚人知足則不辱走者無翼飛者無角山澤納汙聖賢諧
俗老聃同塵卞和守璞誠不能市良田營美祿同仲長統之恣
其所欲余之居此有年矣昔丹其顏今白其顙考志乘之所載

述耆舊之緒言其東宋有船官之解時則施知言樞實守是職

故詩以橫舟編集焉其西明有方伯之里時則應太室望實營

斯第故術尙澆花存蹟焉南則應丈叔雅澄菟裘是守舊第易

主畱室如斗書摹松雪詩亦富有乃祖乃父壽臻耆耄北則陸

丈古漁藻遺有舊業詞雄而肆源瀉三峽潛德不曜干將韞匣

游半天下近乃茗雪又北則張丈訥齋機宅相兆祥連收科第

薇省迴翔文衡屢司發舒所長校士一錄流譽湖湘又北則許

丈小范鑑祖基延慶作宰清廉後昆鼎盛五代堂開一品集訂

簪纓之華冠冕全郡而余是宅介乎其閒伊昔俞丈理究心簡

編於詩書畫三絕擅全此其恒產因災而遷余父營此愛隣水

邊及余劬拓勿華勿妍起瓜廬於左側闢蔬畦於右偏斯誠大

駟所鄙而不游豪士所邈而不眡乎然而居固西林松屏

春秋渚吳秋子吳鐵生喬諸老所盤桓而談經評史也繼又簡

松張鷗盟蘇蕭葦葉閭齋正選樓正曼生陳琴鷗唐小米趙諸

子所過從而敦詩說禮也六十年來文采風流萃於是矣客何

獨以地穢相誚耶噫嘻哲人雖亡故居可考敢存鄙夷時殷則

傲信乎十室之邑必有忠信十步之澤必有香草承學則家爲

儒宗砥行則人爲師表方氣治乎芳荃何腥聞乎腐鮑且夫涼

軒燠館連闔洞房綺疏雕櫳刮垢磨光安宅而居者命也蓬戶

早困蕉田晚收置身通衢附名清流卜宅而居者運也運命不

可妄干鬼將子室之瞰人將子室之尤是故梓澤之歌舞未歇

而寵姬墜樓矣平泉之草木方長而太尉貶崖州矣南園之賓

客正盛而太師函首傳郵矣近市不改晏嬰之樂環堵不增老

萊之憂而傳載表爲高士功烈顯於諸侯一彼一此孰恩孰讐

良由枯與苑之所集各異田與心之所糞不相侔也而欲希富貴之儻來占身名之並泰不亦悖乎若夫厠踰滌而家萬石竹木貯而位三公其人皆處溷濁親奧渫克卑厥躬以視許史之赫胥嵇阮之高抗胥無足蒂芥乎胸中然則彈冠振衣抱潔癖者非盡名流胼手胝足趨下風者或通治具斲輪陳諫而齊桓納操餒進說而昌黎許未聞因其業鄙其人而望望然去之矧數椽之老屋乃先人之敝廬羣從子姓同巷其間黃卷千帙流輝座隅青楊一本分蔭階除洵無忝芝蘭之室乃轉以爲辱在泥塗客始見夫汶汶者衆皎皎者汙愍我身之察察謀寘我於夏屋之渠渠是猶強麋鹿而被以文繡恐爲爭道之擔夫所擲掄也

崇雅堂駢體文鈔卷四

仁和 胡敬 以莊

六朝經術流派論

溯自當塗代漢之後以訖開皇垂統而還隋書著經籍之編唐
賢有序錄之輯經術興廢授受之原班班可考已當塗去漢未
遠師說尙存大儒多出康成之門羣籍未罹晉懷之亂陸續述
易元本京房王基說詩義在申鄭其最著也惜乎子雍無識倡
爲聖證之論輔嗣解經流入老氏之言提暢元風詆排鄭學何
其謬也典午承魏厥風尤熾杜預僻左竟掩服虔之名梅賾獻
書徒承梁氏之僞雖荀崧建議表章鄭易賀循創論竝立三傳
而以時多難虛言莫行兩都流風幾幾歇絕矣永嘉而後南北
遂分南朝諸儒義宗簡約乃退孟子于術數斥鄭學爲支離專

已守殘因陋就寡後儒騁性道之虛悟置象數于勿言其端實
肇此焉河洛殫心詁訓獨守師傳遵明括其全獻之衍其派安
生兼資夫衆說焯炫競爽于一門惟時古文尙書服氏春秋毛
公之詩鄭君之禮各自名家流分支析以視江左殆未可同日
語矣夫六朝雖屢經喪亂而朝廷猶多向學之主草野不乏傳
經之儒誠能兼採異同廣立學校遵鴻都之遺經暢石渠之崇
論用以繼軌建武追蹤西京豈不偉歟奈何信俗學而是末師
致使四氏之易遞亡于西晉三家之詩不傳乎漢初揆厥由來
良多遺憾矣然而公彥疏禮綜括陳邵沈重之說冲遠解書裏
集顧彪費昶之言凡諸義疏多所徵引則諸儒之所以統承漢
學沾包唐儒者其功又曷可沒哉

王尺魚抱影集題詞

蓋自羅幃長夜抒哀騎省之篇錦瑟華年結響西崑之體而人間此恨不少流傳地下埋憂遂多吟咏吾友尺魚王子纏綿成性綺麗多才金粉南朝分華徐庾焉支北里合耦姬姜當其白璧輪來元霜搗就鯉佐餐而替爲掄釣螢照讀而先與縫囊燕燕于飛鵲鵲相比樂何如矣彩高易飛香烈先燼終以熊羆示兆芣苢爽靈蘭徵夢以花凋燕投懷而玉碎而孺人則已腸穿束竹骨瘦香桃曾幾何時便成永訣嗚呼鏡安臺以仍在紅插花鈿衣挂朽其猶新綠飄錦帶分明疇昔擁髻燈前依約生平吹簫樓上儀容何處悵觸關情以至秉燭帷中夢見珊珊之影凝心陌上望歸緩緩之車然而香少返魂草難蠲忿青春易去沉經紅雨之千番碧海雖遙未抵黃腸之一寸愁憑豪素慨想徽音抱影而吟吞聲以泣君於此殆有情不自禁者也乃或謂

莊生鼓缶未哭泣妻曾氏承藜但傳出婦彼遺簪其奚惜何故
劍之難忘孰是達觀未爲通論今夫女子閨房獨處貴賤從人
或終風成怨女之花或遠道化望夫之石又或標梅剛賦寡鵠
旋彈風鑒雪虐之天烏曉夜夜飲藥茹荼之苦花落年年彼丈
夫者許續鸞膠慣輸玉鏡絳羅襦舊從拋昔日箱中紫玉釵新
又戴佗人頭上甚至婦嘯蜂螫兒履霜行柰樹風多蘆花衣冷
不思前日疇分半臂以遮寒但愛新人與畫雙眉而增豔讀是
編知牛衣恩重鴻案神傷因情文之相生令伉儷之增重關雎
之旨蒙楚之義也曷爲過哉嗟嗟人生多故偏在中年我輩鍾
情難辭薄倖君自詞摘大黃絹我兼符寫平黑心所願他年勿
渝斯旨

高穎樓冷月吟題詞

冷月吟者穎樓高君悼其亡妻葉孺人作也爾其素娥慣耐宛
在中央虛幌猶懸憑誰雙照衣上溼盈盈之玉露樓頭升穆穆
之金波鰥魚少眠別鵠成操託深心於毫末傳內助之賢多出
詩觀之知孺人潔抱冬心慧評春月珠懷淵媚玉倚葭明蓋自
一秣齊心雙絲綰臂蘭同功以抽緒禽比翼而蜚聲喜可知也
瑤草不逢曇花易萎長捐錦瑟永閉葢宮嗚呼悲矣雖然聞孺
人病中手進羹湯則膝前佳婦躬調藥裹則堂上慈姑桐華早
敷蔭蔭猶襲舍湧泉而有鯉筍解籜而皆龍側想孺人正當含
笑地下爾君之爲此無乃過情獨是君碧鶴神清黃童譽早生
三代以下恥不好名在百人之中勇而呈技荆璞終獻龍梭必
飛所難者得意歸來重尋舊雨之房櫳追想流風於曩昔見夫
機空倚壁簾竟埋塵佐讀之燈尚篝平矮几代謀之酒早罄於

前宵記否當年瑤琰空回怱怱相對深情慰藉輒語商量教翻
花樣之時新勸理兔園之書冊有約汎雙枝之權爲子送行相
期酬一瓣之香待郎登第言如昨日事有今朝君於此時得毋
腹痛夫豈無銀缸笑對綾袖親裁代白蠟以成吟擁黃羅而貪
睡者乎然而其室則是其人則非兩度看花終灑劉郎之淚一
坏酹土難招齊女之魂雖經匝月以仍圓恐照重泉而長冷祇
今納采已聞輪白璧之一雙佗日營齋幸莫靳俸錢之百萬

書孫雲壑詩後

旣序雲壑詩於集外復見觀潮汎湖二篇其結響也宏其取材
也博韻險逾穩詞繁不支乃知前序所稱未足以盡雲壑也雖
然美兼衆製大家所難經垂四詩爲體自別遠古無論矣有唐
作者自李杜而外如長慶之鉅集歌行絕稀以昌黎之雄材律

體無取雖韓碑傑作亦自擅義山之長而石鼓短篇究未盡蘇
州之勝善乎陸士衡之論曰離之則雙美合之則兩傷博觀古
人近證儕輩而益有味乎其言之也雲壑性情自真塵俗不染
集中大致在於崇尚風格擺脫凡近未知與古造詣何若當其
得意名家不難乃復下採芻蕘重加芟刈但鳴天籟自成空谷
之音無取詞條以爲明月之類虛懷若此進步益高僕學植素
荒濩落無似屬序大集遲至經年歉然於懷非有所慙思助膽
氣苦無清酒之三升顧視頭顱早盈白髮之千丈邇來裁答并
廢過從日疎一室塊然百端交集難忘過庭之訓已半杖國之
年行慚前修詞悔少作見獵而喜奈此結習之未忘知人則明
幸無易觀而相笑

書輟耕錄載林和靖墓被發事後

和靖祠與唐宋三郡侯比肩成四和靖墓與宋明兩少保鼎足爲三巍峻雙峯畱芳千古田氏所載以爲宋經社屋藏發楊髡僕夫之泉以枯學士之溝竟斷遂使壙中藏硯同晉代之蘭亭陌上遺簪等漢陵之玉椀夫以北邙蔥鬱南渡繁華塏隧雲連松楸林列珠襦玉匣帝后園陵天祿辟邪王侯墓道縱使金椎如雨石槨飛灰當亦心豔含珠災生懷璧也豈有生前破屋補藉人貲沒後遺骸畱須友瘞而乃金刀兆夢竹杖疑仙致令華表歸來悵望令威之鶴空梁飛去凋殘禹會之梅須知羸博之閒本無兆域何異要離之塚竟被生穿宋史無徵元碑可按神奇附會尸解荒唐斯眞小說之流傳未免大方之貽笑焉

書馮寶庵先生遺墨後

禮記云選士之秀升於司徒造士之秀升於司馬故國家設立

庠序則簡儒生以督之法言云十步之澤必有香草十室之邑
必有忠士故州黨陶淑子弟則延鄉先生以董之郊南有學國
之所以造士也閭左有塾鄉之所以育材也統於國者歲有試
其責寬隸於鄉者月有程其功密書院之立蓋與學校相輔而
行以佐文衡之力所不逮者也漢崇經術各有師承教授一方
生徒千計白虎講論鴻都書丹炳炳麟麟于斯爲盛唐循八代
之緒設明經之科雖抗顏爲師韓柳相誚而北面受業籍湜皆
才宋明以來精舍遞開寰宇周徧自嵩陽嶽麓建而正學懋自
東林復社倡而流弊滋然而宋削不亡實緣儒學之力持於下
明社終屋半由講舍之被廢而然豈非道觀於鄉化行自近哉
惜乎沿襲旣久規條不修委任旣輕流品亦雜佻達之風熾茁
軋之體行冬烘之笑騰夏楚之威熄泄泄齽齽泛泛悠悠惜無

人焉如吾師寶庵先生者以振興而率作之也先生積學少歲策名中年負蘭臺之英聲擢薦繡之清秩立朝諤諤聞風者振其懦頑善誘循循熏德者化夫稂莠其來主西湖講席也許與氣類詮品人倫講堂徵鸛雀之祥門生絕鮭鯪之議嶽嶽者其道貌溫溫者其德容時則周南卿茂才當舞象之年具食牛之氣芥視青紫心儀古先高朗拓其胸襟森挺出其頭角先生一見傾許三生結緣爲之延譽公卿品藻文字呼李泌爲小友許孔融以通家如扶風之識鄭君比明道之得游酢少安毋躁諷以涵養之功深有美在中誠以虛憍之氣盛知己之遇聞道之早端在是矣今者寢門之慟已踰廿年楹書之存尙守一帙在昔彥先傳餘慶之業身自持喪李漢出昌黎之門沒爲哀集以今視古豈多讓耶抑聞漢代師資之益匡劉而外首推仲舒時

有弟子呂步舒襲其名稱用誌嚮往後因災異之對致興矛盾之攻知乃大慚悔之已晚若是者將先生所謂不務其實而徒涉於虛者歟南卿淹雅之才綜博之學器識之遠到行誼之老成其於先生固已登其堂而躋其闕矣程朱相勉在道德不在文章孔賈所傳以經訓不以位望況乎晚成者器大有志者事成令聞旣彰則國家之詔綽及焉敦行不怠則州黨之美譽歸焉南卿其尙服佩師言以掉鞅文苑之場而勉入儒林之傳也乎

石屋洞銘

屋以石名功謝土木石不皆洞洞不皆屋形惟特肖名乃專屬高容建旂廣任旋轂石樓異洛石室同蜀雜花飄英芳草含馥東岡巖扃紆迴而複西懸岫幌窈深而曲裁雲作屏招月爲燭

何須低頭大可容足清泉珠瀉且嚙且掬殘碑苔蝕且捫且讀
游山客佳題名我俗屋下架屋一笑捧腹

于忠肅公像贊

并序

道光丁亥冬十一月忠肅公十三世孫銜奉公神儀屬敬題贊
敬惶悚避席饋沐展觀按像公闊面微髭神采炳若團領窄袖
蟒玉燦然佩有牙牌文曰少保攷明制窄袖爲武臣之服佩牌
乃常參之儀公以總戎兼督京旅戎容暨暨特異製於朝班象
闕巍巍藉通名於門籍觀公像而當日九門捍禦之策十營團
練之勤廟堂倚任之專宵小猜嫌之隙胥恍然於心目間遇之
夫明堂繪像昉自周公良金鑄形聞諸句越公於恐懼危疑之
日倡大義以定衆志正其善輔成王也於戎馬鋒鏑之交斥邪
說以奠神京豈其功輸少伯也此在西漢當署名麟閣東都應

首列雲臺矣且以唐之馬燧渾瑊尙圖形凌煙閣上宋之趙鼎
張浚亦寫貌景靈宮中信乎生有大勲沒宜崇祀英廟之配殿
與饗祫禘肖形丹青者非公誰屬哉奈何南內車駕東市朝衣
徒借目以明冤竟碎身以成讖一腔熱血班班痕漬於緋袍千
載孤忠凜凜光留於素壁贊曰

赤山表墓清河建坊公塋公宅公靈斯藏恒代之原瀝淵之曲
公澤長留公尸公祝太弟內立上皇外歸公忠公勇公身以危
收京如郭汾陽兮而天不祐殲寇如岳家軍兮而功竟就班聯
特進兮牌獎殊勲爲錢越王之賜券耶抑平原之告身靈爽式
憑兮像還後族其狄梁公之遺容耶是丁蘭之刻木街藏公像有年爲族子借摹遂
機於火會朱孝廉葉雲麟得公及夫人遺像二幀送貯水壘閣之
佛龕銜開而奉歸公靈所憑亦街孝思追遠所格也故贊末及之

奚鐵生先生像贊

并序○像爲
顧洛西樸寫

奚丈揮灑詞翰自足千秋跌宕風流不可一世當夫岑連苔合
鼇作鯨吞擲飲貴游擺脫凡近卿自難識白眼睨之我醉欲眠
玉山頽矣嬉笑怒罵行之卽成文章牙慧唾餘拾之已邁流俗
游方之外與古爲徒襟期旣超造詣自遠不徒胸中別具邱壑
腕底饒有雲煙已也顧君西樸追憶風裁爲摹楮素三毫添頰
神采欲飛半面寫生須眉如覲嗟乎陳濁醪於短几歡若生平
想故態於當年邈猶河漢贊曰

古稱三絕曰晉曰唐唐鄭廣文晉顧長康顧癡已甚鄭貧自傷
安貧而樂易癡而狂夫惟我公兼二子長湖山蘊奇天地洩祕
在宋襄陽在元清閬有兒能讀有廬足蔽祝融造災童烏隕涕
閒生之才造物所忌憶昔髫歲我嘗侍公隆隆者準爛爛者瞳
爍花言論槁木心胸如爨後桐如澗底松如林下鶴如天際鴻

先友之中如公蓋寡盛名不朽大年難假公去不還我淚盈把
買絲以繡鑄金而寫於意云何後無來者

中大夫與齋金公像贊

葬

原夫尊祖敬宗收族小戴垂文孝弟任卹睦婣司徒立教倫紀
飭而後家道正本根篤而後子姓昌伊古以來未有豈弟之風
不先門內詩書之澤能劭家傳者也與齋金公幹濟懷才沖和
毓德黃山白岳遠繫宗支梅市柯亭近分流派緬稔侯之翊漢
郡望巍巍法管子之通商客游歲歲江鯉有寄護韓時其旨甘
原鴈載鳴棣鄂均其榮瘁置義田而貧得所養文正襟期敘族
譜而疏者皆親明允論斷散財重積慕少伯之爲人輸粟因公
奉西京之故事跡其赴義若渴從善如流固已廣譽徧於公卿
芳型樹於閭里矣是用承天貺獲神祐先後感應章灼著明公

祖塋卜兆新安前明聚葬暨值桑田改易枌社播遷遂至高曾
未安窀穸遺乃祖乃父憾以終身訪若堂若防塊然淺土一坏
待掩三板增封習氏阡荒幾失魚池舊地滕公墳久難摹石廓
遺銘卒使父老語以殯存書生指其瘞處俾得昭穆分序松楸
列行同唐伊慎之銜哀比晉周光之獲吉斯誠敦本之念鏤自
肺肝追遠之懷縈諸寤寐者焉尤可異者公像生前所續題皆
鉅公儀型式瞻詞翰徧灑一時蔡中郎著作羣推有道之碑文
中子生平補載無功之傳謂宗族所題曼倩畫在贊之者有夏侯清閱
圖傳銘之者爲文氏嗣因繭紙遭損於暗檻標綾待整於良工
爰出舊藏俾臻完美詎料鬱攸煽虐屢肆成墟神欲攝乎丁丁
烏乍呼其出出融風熾而誰濡馬褐崑岡燼而分坼雞碑僉謂
椽筆失其三長飛煙付之一炬已而乃燎原張甚竹簡仍畱落

水依然蘭亭無恙足信廬陵阡表蛟龍畱爪趾之痕肯教李杜
文章丁甲掣風霆而去樂巴嚙火匪方術別有神奇劉昆返風
乃冥漠爲之呵護孝弟之至通於神明積善之家必有餘慶豈
不諒夫文孫芸舫述清芬於前列彰懿行於來茲羞牢醴以告
虔保丹青於奕禩孝思不置永舍刻木之悲像設長畱用表佩
韋之度贊曰

三天子都漸江所出天目東來扶輿蔥鬱猗歟我公鍾靈毓質
占籍臨安治生於越溫溫者貌蒼蒼者須春藹秋朗金貞玉腴
纓組不飾從乎遂初中拂不御契乎貞如九朽呈能三毫謝補
如范良金肯薶焦土虎頭神肖馬鬣封古慶集厥躬蔭承自祖
石人之隲秦亭之原桐鄉心愛潁郡支傳梅花萬本敢宮數椽
賢峯分幹歛水同源

羅節母何太孺人傳

太孺人姓何氏神仙華裔水部清門謝氏才華不矜道蘊班家
史學能續孟堅其來歸山友羅太翁也舫載青廬匿攜黃卷憶
母詠鼉江之月色瞻兄懷鷲嶺之潮聲晉代畱丹谿同訪葛唐
賢表緒宅尙傳羅峯卓筆以當眉山餘航而在目愛平陽之道
近安廣漢之家貧時則太翁孤露餘悲含飴承蔭依劉如李偶
孟同梁太孺人以不獲逮事尊章親供滫瀡勉顯揚於君子虔
調衛於皇姑每當繡帖停餘紡磚閒後相與裁箋隸事秉燭評
文釧影落平行閒茶痕畱於襟上斯真良友堪其論心所嗟衛
玠清羸崔駟勞瘁丹鳳匹鳥而雄飛一朝黃楊貞枝而閨厄三
載呱呱者襁中之穉子皤皤者堂上之衰齡太孺人謂烈易貞
難言可證諸汗簡仰事俯畜身當代彼泉臺肄書則并荻是資

貧惟四壁孝養則江魚入饌供有兼珍暨乎萱感霜凋菽嗟餅
罄更無歲入何以家爲於是攜羅含白鳳之雛寄何妥青楊之
巷證成宅相族黨相夸徙居信安舅甥不別取惟諸史清操蒙
賞於少文詠就閒居雋句追蹤乎小謝卒使五鹿馳譽貢乎成
均三鱸兆祥議有都講通經守其襲訓奉檄償以冰銜因之官
領文翁軒扶潘令枯蒼山畔雲煙迎問字之車靈運祠旁絃誦
啟宣文之帳餐青芝以駐景頌紫朮而怡神亦足味慰蔗甘養
娛蘭絜也而乃瓠哥方奏鼈唱旋聞華表之鶴不歸束修之羊
空饋婦歎於室傷兩子之尙孩吾謂之甥太孺人娶女兒汪氏姪爲子婦竟二人之
同命太孺人謂我心可諒天道難憑旣攜持保抱而不假之年
惟困苦艱難而自安其遇遂乃歸廣柳於梓里儼短椽於虎林
將澆麥飯以憑誰難覓菟裘而終老坎軻備歷值此桑榆荼蓼

分嘗倚如邛岷小樓燈影婢媼跡屏乎親隣深院碁聲婦姑誼
均乎師弟分甘一嚮解憂惟就塾之童茹苦半生入夢有同耕
之耦斯固染瀟湘之竹未足抒哀化精衛之禽無由填恨者已
豈知霜雪薦至嚴寒倍顯乎松貞羽毛漸豐令譽自徵其鵲起
孫年逮壯能繼起以象賢子舍雖虛爲撫孤而慰願紹清芬於
課士秀擢桐枝著茂績於考功榮膺花甸芸香三代慈烏殫覆
育之恩樾蔭千尋鉅鹿懋追崇之典系曰

湖山鍾秀邦媛代生識資學劭境彰志貞白華粲粲黃鵠聲聲
無忝女憲偕子成名鍾郝均賢紀羣不祿機空宵斷髮惟晝哭
追想儀容愴懷顧復蓼莪之詩丁蘭之木莫報者德猶慕者心
鐫華琬玉揚芬藝林紫泥章采彤管徽音不有苦節焉兆甘臨

高母許孺人傳

孺人錢塘國子生許人龍之次女孝廉高鳳詔之繼室也承太
嶽之華裔齊美姬姜奉渤海之清塵垂型韋柳女憲夙秉儒風
代敦弱未勝衣解賦庭絮生當毀毘還蓼堂萱勉事新幃晨昏
修其定省愛憐少子長養別其榮枯竹因苞異以失慈烏縱巢
移而仍孝鴛機織素嘗嫌三日之遲鴉鬢堆青有待十年之字
淑行徧聞於嫺郇好述遂締於名門年二十三歸於高氏時也
膝前紫鳳雛剛試飛掌上明珠纖已耀彩孺人念昔年之柰樹
守有兄祥防今日之蘆花寒生兒閔縮衣節食痛既定以還思
就溼推乾愛有加而靡替鳳詔因嘉耦得助內顧忘憂結褵後
遂屏跡塵囂覃思著述攻苦則鎮瓜自勵專精則漂麥全忘以
乾隆甲寅舉於鄉秋賦既充春臺欲上暫違梓里預約刀鐙可
信者天邊之月重圓難憑者海上之風引去暫爲六月之息鴻

爪仍畱拚作三年之淹覓裳定詠不謂鳳麟榜發李薦終遺龍
蛇讖成子雲見阨難逃河朔之暑未卸雪川之帆嘉慶丁巳歸
自京師卒於練市舟次距廬舍止一由旬之近緬音容成千厯
劫之遙班定遠絕塞生還尙躬到酒泉之郡王子安洪都歸省
竟魂銷彭蠡之津寸晷難延尺波空謝孺人聞訊之下慘不欲
生磨笄所甘顧髫稚以何託化石空望竟死生之永分勉視息
於人閒代服勞於地下重以後先荆棣季嗣叔而呼臯遲暮桑
榆姑痛兒以成療相偕下世曾未踰年急景窮陰遭冰雪之淪
至新愁舊恨禁荼蘼之兼嘗遂抱沈疴纏綿牀第緬求靈散量
料刀圭如是者荏苒十年不逢秦越倉皇一夕將入膏肓束手
醫宗徒檢方於肘後皈心禪悅忽示兆於宵分託旃檀以返魂
同蘆服之現夢從此伊蒲供饌鮭菜蠲除薺薺開林榆櫨崇奉

海枯石爛不聞遼鶴之歸來伏雨闌風又見靈椿之老去蘋蘩
敬薦是曾逮事之尊章筦鑰分司惟與同嬸之娣姒菴卷心以
苦節蔗厯境而甘臨婚嫁遞完於焉稱老馨潔相戒長此含飴
每當綵輓門懸畫屏堂列茝蘭紉佩芍藥調羹微雨新晴迭奏
潘安仁之絲竹良田廣宅新遷仲長統之園林以茲福祿之膺
宜享期頤之壽終以環瑱久撤半生之憂患頻仍門戶勞持百
歲之神明易盡里動蒿唱得沈婺輝年止五十有三悲夫草木
欲長霜露不使賢者欲養二親不待想芳徽其如昨知銜恨以
何窮懿訓千秋佇建潁川之表豐碑百尺誰刊少室之銘

重修會稽大禹陵廟碑

稽古六十四民之祀秩宗以無主而推恩七十二代之君祭法
以有功而望秩是以龍髯攀墮橋山護劍舄之陵鳳竹斑深梧

野奏英皇之樂序星辰而郊鬻臺野西連均刑賞以宗堯穀林東峙大陵享帝樂櫨畱啟筮之亭有畀稱君俎豆徧象封之國而況鬢河著蹟厯八載以成功嗣子消爭冠百王而立極者乎會稽有大禹廟其來舊矣迺者閱歲既遠建議重修風雨連朝梁匪梅而亦化春秋何祀山有木以宜刊於是邑之搢紳率諸耆老申請大吏遵奉

詔條鳩材庀工斲樸塗墍於某年月日經始某月日落成禮也或謂白衣砥礪故居指崑石之鄉丹殿陰森遺址列盟津之岸過中條之廣野避暑畱宮訪五嶽之名山封泥表埃湘潭磯上虹光騰飭帝之金嶧家巖前珠滴瀉扁池之水建護祠於夏邑金柳城高耀華廡於巴江石泉都遠豐碑安業蛇靈銜岫嶼之文斷碣摩挲蚪篆認崆峒之記倚梯崖險魏都之貞石畱銘望

國雲遙蒲郡之清臺置驛固不獨禁明脩鼈丹忱輸東海之民
殃免爲魚靈貺答南浮之洞已也不知捍藩禦患澤無遠而不
畱崇德報功神所依而倍切溯自磐石探神符之祕澤息滔天
釜山懷州鎮之功耄因畱越慰劬勞於聖妣爰開修己之宮配
饗祀以賢丞勿替少康之世逮及仍孫創霸猶嚴樵採於陵山
支子分封永奠烝嘗於越會豈不以巡方不復魂魄長戀乎茲
鄉穿壙猶存衣冠不同夫假葬哉獨是不矜見稱於虞舜無間
遠歎夫宣尼後之人溯澧水而念貽謀景梁山而懷舊甸推崇
匪易贊美奚從所希秦望畱嚴蹕記祖龍之駐史遷好古穴傳
司馬之探則謹就於越之遺勛以歌詠聖神之丕績焉試觀斬
高喬下導滯疏停梳三門而斲二渠纚扶風而沐淫雨濟巨浸
則鼇梁跨遠踰翠岑而蛟馭騰空遂乃南修彭蠡之防北掘崑

崙之地期愆癸甲少整冠納履之間輔藉庚辰得斬石疏波之
 助撫蠻夷於窮髮山造積冰追羲馭於扶桑淵臨沸水山樺泥
 橈徧續櫛攢樹之鄉形瘦神勞奠丹粟黃支之宇罔勿親程畚
 築界別瓜離赤埴青墟十二襄之條絲異種擊閭出瑱三千里
 之筐篚同風禹之平成大矣然而栽梨蔽畝標青玉於衡巖望
 柳回車慘元魚於渾渚裸入狼隍之國繪竟忘垂迷登壺項之
 峰泉還共掬民傳飲露荒渺難稽山到指天迷茫莫辨曷若三
 江歷歷南條畱疏鑿之蹤九山戢戢東冶著隨刊之烈了谿流
 水含仙澤以浮藍嶠峴荒城仰神功於頽雉石船猶在遠想乘
 蹻度弱之奇畫角仍鳴如聞濁水傷枝之歎是則赤帝之巖鑿
 而懷襄之災始平蒼水之使來而山川之理乃得此會稽之所
 宜崇祀禹也爾乃蓋地披圖鈐天造歷以南至六十日爲正歲

紀甲寅步東極二萬里而遙算操豎亥感金符而制崇白乘木
德而服尚青任賢使能公卿修五等之制貴爵尊齒學校宏二
序之模定考績於三年修巡方以五載聲爲律而身爲度左應
繩而右應規夫且五行開聽朔之宮堂修二七九等定惟貞之
賦歲歷十三夏畧春斤民力厲畋漁之禁史箴瞽誦臚言納耆
艾之規元卷延垂受寶錄靈符於文祖白菅采純座精稱吉玉
於名山巖俎山疊映牟追而光燦雞彝龍勺施彫勒而輝生牲
用黝而先薦心祭以闡而其祀戶禹之禮制備矣然而東南巡
守獨傳大計之名中外共球共輯維揚之地探雙珪於碧岫日
月光華裊四帙之黃圖河山流峙羣神用致祠上帝於北阿陽
翟忘歸泊餘航於南鎮用以調權衡而平斗斛見耆老而納詩
書至今白璧騰光穿土啟千年之瑞青山望幸負展畱萬古之

稱是則百六年化制之隆真盛於茅山之會七千國聲教之訖
最著於玉泉之朝此會稽之尤宜崇祀禹也若乃駢三聖制九
招奏六英舞八佾洞庭張樂作大訓大化以颺功夏籥成章先
大濩大武而致物由是憲道陳鼓復獄揮韜設五器而銘以垂
奏九原而功惟敘命扶登以拊石六府孔修詔大業以賡歌八
風不應階前浮磬遙分山軌之輝堂上孤桐旁接龍章之色大
鹿巽而喬雲現元珪錫而康歌興禹之樂章明矣然而帝乃持
衡竟退虞韶於賓位啟因嬪女遂傳天樂於人寢嬰一璧於熊
山儻千儻冕擁三層之雲蓋操翳操環未免神奇難從徵信何
似狐來自遠妾待其歸成室歌興發響禽山之麓候人野望始
基南土之音述洪水之愁民襄陵作操幸赤衣之貺我覆鬴成
吟似蠶追存剡水觀棧鐘之制如皞樂奏防山聞截竹之吹是

則聽厖尾之歌乃以驗大夏之勤而不德觀被髮之舞益以信
九歌之董而用威此會稽之尤宜崇祀禹也佗若乎龜負文青
犬授簡六甲陰陽之道八卦勝負之符黑書示兆乎臨洮綠字
呈祥於濁水象垂括地韜以丹縉圖啟開天檢之元印爰乃岳
瀆輯記山海編經臨流沈祕景之符衍範闡真靈之要蛇神現
而天帝賚寶文之冊龍關鑿而河神獻金版之編牧德符傳杼
山銘勒舉凡衡華空同之上霍鬱嵩岱之間莫不龍畫旁分螺
書圓刻禹之文章蔚矣然而白銀青玉是封石碣之中金簡紫
文猶貯瓊樓之上元夷使者授圖在宛委山前青虛真人傳道
於陽明洞側是以吳宮啟宇書隨赤雀以銜來越女繅絲繭託
白魚而化出向使二五九跡之術徒授琅風一十二卷之經未
探巖石東南有柱不傳黃帝之中經靈寶無書空遇清都之元

女將見青泥欲記而古篆難求白馬空刑而名山莫攷符絕龍
威之獻河空馬頰之疏說地無書冀州何載仲舒淹雅終難名
異烏於重常子政宏通且莫辨枯骸於貳負是則虔齋巖嶽爲
十三年受命之原倚嘯苗山開四百載同文之治此會稽之尤
宜崇祀禹也至若通九術五勝而師徒其興定弱守強攻而城
郭用作牘辟宮辟剝辟墨辟律乃制爲三千條象刑官刑教刑
賊刑罰無過乎二千鍤詔血涂以正訟建鼓朝端命天老而肅
兵樹綬車右蒼梧泣罪寓忠厚於刑誅元戎誓師震威明於步
伐因之乘駱馬以御戎事駕鉤車以整軍行戮相柳於崑墟澤
谿三仞鎮文祈於渦水鐵鑊千尋鼎鑄雄金寫神茲之象階
陳干羽壘降反背之苗囚鴻蒙而走鴟脾肉穿胸而墟有扈赤
枝被石遠攻雲雨之樂獨木浮船肆伐尼陳之梓雲中紅袂盡

佩刀裹甲以來朝江上黃龍且掉尾弭鱗而聽命禹之刑威赫
矣然而專車節大防風伸後至之誅焚甲仁施大越驗諸夷之
附當其舟航甫捨玉帛方陳而遽攻曹魏以徇羣侯伐屈驚以
威逆命嚴埋銅劔鵜膏舍列宿之輝地築刑塘沙觜閼巨人之
跡夫豈若獄臺囚舜吳刀出散罡步檄鬼狂章命神附會無憑
浮夸難據哉是則奉辭伐罪有綏服奮武之明徵先祿後威亦
禮家右文之過論此會稽之尤宜崇祀禹也爾其好緣惡阻先
信賤文七表承風九埏復璞胼胝均勞於廝養儉勤秉教於甯
真總細布以爲衣剡明水而薦廟龜貝銀玉五品從興茅茨土
階三等勿越凜投饋而勤捉髮輕尺璧而憐寸陰顧絕遺簪廷
任雀羅之設歎聞折額醪終帝女之投雖蔣席拊鞞器創縵綠
之飾而彫牆峻宇訓還典則之垂大興柔利之臺爲居羣帝偶

鑄厯陽之幣祇給諸侯允宜令把元宮膺司祿司金之福猶且問周下士切爲驕爲汰之憂禹之儉德昭矣然而玉色封蒲甘醢著仙經之品珠光造粉增華傳墨氏之言敢安邑之離宮丹庭紫殿辟鍾山之華宴玉柰金漿說總違經言眞罔聖豈若土纔掩壙千人圍封樹之壇窆尚畱銘七尺聳嶄巖之石斂形骸於終古桐可爲棺開都會於當年門惟橫木伐山易竟改畝無煩是則隧道之不及泉淵實垂明訓無余之不修宮室乃紹前徽此會稽之又宜崇祀禹也至其尊墨如以作師引羣子而爲佐立十二嬪以輔內治得七大夫以贊宏猷奚仲則車正是司昭明則人時敬授學於西王牂而聖德懋鑒於東里槐而政令明舉大費於陰方之中避商均於陽城之下忘有過人之質染以皐陶本無私啟之心讓於奇子瞻耕式耦通方外以求賢入

水詢漁秉虛中而適野虞黃童律資爲禦侮之材橫革直成訂
作同聲之侶夫且賜成光以參龍之氏封相土以牧馬之勤掌
火焚林隕斃擅百蟲之號分流闢華巨靈畱雙跡之蹤五臣備
黃帝之官黑風會紀九土奏黎民之粒稷契宣謨禹之芻求切
矣然而巫岫神遙空枉雲華之謁天官書獲竟煩風后之咨溯
吳越而決江流曾偕六子共益夔以求川脈同受五符歲以犧
供儋伯翳匡襄之績帆仍石峙仰聖姑翼輔之勲是則卿士之
配明堂尚傳越絕昊蒼之賜神女獨在塗山此會稽之又宜崇
祀禹也至如廣柔敬聖高密鍾靈略明之世胄非遙女狄之徽
音不爽參效瑞而星貫昴月降精而珠墮懷遂乃越十四月而
降生歷十二年而佐治鈴星首戴臙韞采以河渚墨斗胸羅軒
蜚文而玉立參漏紹達聰之聖偏枯徵行遠之勞稻雨天來木

禾地出乘船八月早名懸玉兔之旁夢日湔河終圖受堯壇之上執纛而度地沒爲紫庭真人入空巖而遇神呼作華胥聖子以至神鹿行水元龍御雲祝融降乎崇山騶駼出於方澤禹之符瑞顯矣然而石坳石紐地旣傳譌女志女嬃名還互出石傳開母化熊之說無徵坪號剝兒剖脅之言尤謬蛇身可駭荒唐御寇之詞龍冢難尋幽渺青城之記以至通女台桑之野解身陽陟之河欲弭患而戕生竟合昏而非禮有崇何在神其跡於薏苡之吞重華未升示其文於璿機之握此與夫黃能入水朱顏窺屏難以言詮同其語怪者夫惟栖神築館烏耘昭咸若之仁庶子儕民燕噪感非常之瑞覩參耕之千畝麟想游庭酌菲飲之清泉鳳疑栖樹是則玉簫書藏之地寶鼎湖龍去之鄉越棲甲楯之山正舜葬蒼梧之野此會稽之又宜崇祀禹也夫

是以有宋開基置守陵之五戶前明定禮修告祭以三年丹雘重施新葺在紹熙之歲山龍作繪呈圖自洪武之朝我

國家治繼三王文敷四海

翠華親謁薦歆昭

列聖之虔

丹誥新頒膺籙展明禋之典

特遣皇華之使昭告明神恰逢輪奐之新重開廣廈當春令布星槎拂漢以遙臨不日功成虹棟排雲而上出繞砌列蒼官之仗表社仍松塗墉依世室之規夾窗有蜃法遵積矩度陰陽向背以咸宜訓凜卑宮絕玉礪金鋪之華飾圖九州於廡下大匠咨般模五嶽於楹間遺經披益展雲旗於枅栱敢諫幡懸栖金爵於觚棱伺風烏肖冕旒秀發絃絃垂亥旣之光階隄嶙峋奮

揭效子來之職不是武梁之殿曲尺還操試摹鍾鼎之書凋戈
重劫貢如任土垂橘柚以盈庭鳥尚隨陽飛鴈鴻之滿野用以
迎神祐體

皇忱刻桷丹楹輸三品惟金之利薦腥饋孰酬萬邦作乂之勳
仰複廟之巍巍陽開陰闔望佳城之鬱鬱人往風留明德長懷
竊效巴峽無功之賦煩言何補竟同相斯沒字之碑銘曰

茫茫禹跡畫爲九州立極鼇足拯民魚頭丕冒所訖含生之儔
罔不鳧藻頌厥鴻猷緬昔中天洪流砰宕舜華掩重堯勛辭放
緡淵莫填息土虛障玉牒天啟金精宵降往求平定宿嶽麓庭
八年於外四載是乘心剝形瘵仰高俯深植嶽以峙刷河而淳
南踰北過西延東造如風之熏如雨之膏通脈百川回光二曜
大夏歌成九天功告騁乎鼓之軒乎舞之光華復旦卿雲爛施

龍蟠於野龜游於池迺伸德讓迺總帝師於帝陶真昇而天祿
彼微者理彼危者欲形期於緣德誠以率心傳既授坤珍乃握
五玉三帛來巡自東升禋泰岱輯瑞侯封震澤底定江漢朝宗
爲綱爲紀成允成功巍巍四明迢迢五泄有阜惟鐘有水惟文
鏡湖帶前爐峯環側萬古存陵一抔表穴丹崖拔地蒼松蔽天
玉篴山下龍瑞宮前銘搜稹勒碑剔魴鐫爰究爰度有烏有樾
奉璋戢戢新廟奕奕旌揚其綏豆羅其揭階敷篋蕩璣盛黍稷
維揚之產厥包之錫禮崇祀典
睿藻頻頒千秋萬古帶江礪山虛室生白飛閣流丹宏規大起
密石重刊

贈湖州府同知徐公墓誌銘

公諱禧字煦亭先世籍江右之臨川始祖哲四公於前明嘉靖

初游滇樂之遂遷焉效清潁之移家方文翁之教蜀詩禮以訓
雲仍乃縣再傳思正公萬厯戊子舉人官灤州牧一麾出守韋
紘自箴七葉詒謀軒冕相襲祖龍山公德業懋修藝林推重多
文爲富以道得民父遜夫公中乾隆壬戌明通榜授雲龍州學
正累官徽州府知府岷峨秀毓黜歛流清嵩華仰其風裁廉讓
挹其襟抱歲已巳公誕於雲龍官署韋齋僻地篤生大儒博士
冷銜獲書上考遜夫公旋膺保薦作宰河南出身臨民單車就
道寄孥梓里樹蹟棠陰公隨母王恭人家居文葆甫離絳紗授
讀冬禪阻製夏簋屏揮稍長以將父情殷倣裝言別華年入洛
羣慕陸平原之名遠道依親尙少蘇叔黨之歲踰年歸里杜門
卻掃爇柴著書蜚聲膠庠延譽耆宿難奪者昭諫之命可信者
孝穆之才篇成則十手傳鈔思涌則百家騰躍其學之綜博有

如此者公束身儉約而雅好施與孫金盧米瘠家肥人蘇譚范
田敬宗收族與人晉接醴醴乎味醇如醪持已謙沖淵淵乎懷
虛若谷其行之謹厚有如此者歲丙申遜夫公由郡守致仕歸
田之樂繼軌二疏數馬之風同符萬石公侍奉昕夕調和滑甘
履道建坊參陪乎文譙通德標里秉承乎經資歲壬寅遜夫公
感患沈疴時公方遭母王恭人喪迷惘之中割股以進介推前
事訓臣效忠緹縈上書褒女爲孝身尚可徇何惜乎肌膚天且
不違有踰於藥石譬秦醫之術能起死陋宋儒之議謂傷生越
九年遜夫公考終同時公從父母亦相繼下世遺二從弟纔弱
齡疾痛偶嬰夜爲數起衣襦分給視如所生束髮勉以從師連
襪因之游類竹林競爽花萼成編綜公生平爲世模楷門內之
行無媿乎隱微身後之榮宜邀乎寵錫積善有慶全受而歸以

嘉慶丁巳年某月日卒享年若干歲德配向恭人梁魏望族郝
鍾令儀鏘佩徽音聞乎味旦納櫬書冊課以寒宵後公十六年
棄養以某年月日卜葬於阿科衣之原禮也子五人長雲笈庚
申舉人仕至湖州府同知次恒仁縣學生次雲伯太學生次雲
驥雲耕德星所聚賢萃於一門燕山復生人擬乎五寶信足嗣
嫩往哲垂裕後昆者矣敬誼託苜蓿茈邀粉社夙聞潛德用勒
貞珉久乃表阡待書崇國公之爵成無媿色竊比中郎將之碑
銘曰

猗歟我公基德孔厚溯源西江炳耀南斗世累甲科家駢組綬
公生其間守先待後惟公之行如璞未剖嫗物慈祥禔躬孝友
衣縕不恥指囷任取秋月襟顏春風軒牖惟公之學如海兼受
經研鄭服文述韓柳著奇三壬探賸二酉章迴雲漢奧挾淵藪

學行交勗金石齊壽宅兆卜幽庭訓傳久貽芬子姓藏神岡阜
鐫翠書丹永垂不朽

明經崔君墓誌銘

代

君諱脩士字獻廷常州荆谿人也蟬冕之華著族望於山左龍
紀之末衍派別於江東十二世祖璩元至正間通籍在朝遺愛
在邑嘗建二石梁於其里人德之號兩橋公繫名陳公之隄誌
美蕭家之渡祖至倫潛德不耀敦行不怠有古風節爲鄉典型
父燦文詩書淑身愷悌成性與其季推肥代瘦前襟後裾風雨
之夜聯牀郊墅之居會食君志尙恬裕襟抱冲和眉宇翹秀於
五常躬行奉教於萬石弱不好弄長而通方甫冠游乎上庠積
鯁貢乎太學表聖成均之諷子玉座右之銘身爲師資心紹家
學年三十一遭母徐太孺人喪以伯魚之忱誠兼步兵之至性

泣繼以血毀不勝衣問安飾容恐重大邱之感退居讀禮無閒
仲郢之哀旣免喪遵過庭之訓言作都講於家街間左置塾耕
餘肄經重肉饋以銅槃聯鄂蔚其珠樹劉孝綽之羣從少長能
文孔平仲之諸昆後先擢第暨悲風木旋感人琴懼通德之門
衰遂高陽之祠建東眷西眷范氏之義莊長存上洄下洄蘇公
之譜序可按君持已以約接人以寬見容覆羹王褒爲之毀約
聞戒折爨許武因之讓財進取旣澹於心閒居以適其志待客
懸孺子之榻藏書建元龍之樓叔度之量淵然啟期之樂全矣
乾隆四十九年某月日卒春秋六十有一配許孺人少擅高志
來歸詩門逮事舅姑葺萱生盡其養助營葬祭蘋藻沒竭其誠
猶子應書痛蓼莪於弱齡悼琴瑟於中歲孺人代理淩襍俾專
進脩卒使袁豕慙乎先基疏受挺其亮節成半千孫之譽無第

五倫之私士族女孤貧無依孺人撫如所生既笄爲擇壻嫁之
焚彼券質竟歸羅讓之奴輟其匱資先遣鍾離之女方諸前烈
無多讓焉五十三年某月日卒春秋六十有三卽以其年某月
日合葬於均山鄉西堰之原禮也嗣子錫芬錫華芬以鄉貢秉
鐸鬚序華以解首釋褐春官雖星霜序遷而祀帖慕切緬游景
之不返慮先德之就湮求誌平生託行久遠某誼均孔李才識
郊祁爰不辭所請而爲銘曰

博陵遠裔璿源自姜衍華晉宋均美潘楊望崇海岱支分李唐
陽羨名邑均山表鄉菴畫谿清善卷洞古西峙山亭東連申浦
澤貽棠甘歌罷匏苦以啟後人厥惟遠祖懿歟崔君強識博聞
八米馳譽一經紹芬義方鍾郝名譽機雲血竇蘭悴淚枯荆分
秉誠興宗繫懷敦族課勤絃誦祠序昭穆翩翩八龍嶽嶽五鹿

一
三
綱芸世承科桂歲擢愛耕石硯鄙執牙籌化爭而讓摧剛以柔
暴惟理遣誤可情求雅談宗謝淵度師婁淑慎孺人同心合耦
案影齊衡機聲達牖布被於躬荆植其首不愧萊妻允稱陶母
感深同氣代撫遺孤貧憐弱質忍例傭奴訓勤家督垂範宗姑
存沒尸祝閭閻楷模穆行不虛爲善足恃緒承前脩昌兆令子
瀧岡之阡百瀆之溪重勒貞珉永垂奕禩

項甥女哀詞

壬戌秋蓮峯以哭女詩見示甫越歲其次女又以疾卒嗚呼紫
石移文之勒尙有餘哀青谿小妹之殤何當再遭女幼而聰穎
長更幽閒按孝娥江上之碑齒踰其四數織女天邊之宿序屆
平中方將屬婢牽羊隨耶挽鹿衣裁遣嫁敢展求婚何圖珠碎
掌中燕飛懷內秦簫未引謝絮先零嗟嗟蓮峯何以遣此蓮峯

錦瑟之斷悼乎英年春草之生感以噩夢爾乃西堂之痛未已
東野之悲雨嬰莫不賦有篇章寄斯哀怨陸機老去大都歎逝
之文吳質多愁不少言情之什遭際如此亦云窮矣而乃星燧
纔更芻靈復設傳來臣妹才亞班昭祭又女孥神傷韓愈一摘
瓜少經再摘以何堪小孤山傾逐大孤而飛去蓮峯哭之有句
云舊恨未經秋雨洗新愁又見曉蟾斜抑何悲也嗚呼人到中
年情關兒女事難如意樂數家庭蓮峯骯髒半生艱辛一第數
椽老屋突兀橋東萬卷殘書編排硯北所賴病妻持戶弱息牽
衣孤館歸來迎門笑語憐耶耗目勸少嚮書代母供炊爭先饋
食於以繞牀看平陽之戲挽鬢忘杜老之嗔亦足稍慰窮愁藉
娛遲暮也奈何團樂燈火猶記前宵閨寂書窗已成隔世埋憂
有地離恨無天落落此生區區不界雖行路猶爲之歛歔累息

悽愴傷懷已而況戚屬如僕者乎稱誅非禮爰哀以詞

蕭艾挺秀兮蘭荃萎芳
樛散則壽兮桃嫣而僵
冥冥者數兮悠悠彼蒼
昔也迎門兮挽手相將
今也入室兮遺挂雙颺
愁添白髮兮痛撫黃腸
歸來歸來兮父母之旁